

02. april 2019

UPA 2019/128

**Nunatsinni innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigisassaattut siunnersuut. Ilinniarfiusinnaasutut suliffiusinnaasutullu piukkunnaatillit qanoq tapersorsorneqartiginerannik aammalu inunnit pineqartunit inuiaqatigiinnillu pisariaqarneratut atorneqartiginerannik erseqqinnerusumik qulaajaanermik misissuineq imaqassaaq, soorlutaaq misissuineq innarluutillit ilinniartitaanerannut suliffeqarneranullu tunngasumik siunissami ilisimasaqalernissamat qulakkeerinnittumik aalajangiisoqarneranik malitseqartinneqassasoq.**

(Inatsisartunut Ilaasortaq Aqqa Samuelson, Inuit Ataqatigiit)

Inatsisartunut ilaasortap Aqqa Samuelson aalajangiiffigisassaattut siunnersuutaannut Siumumiit imaattumik oqaaseqassaagut.

Siullermik Siumumiit siunnersuuteqartoq qutsavigaarput. Nuannaarutissaavoq Inuit innarluutillit pineqartillugit partiit akimorlugit suleqatigiinneq paaseqatigiinnerlu annertoq maani inersuarmi ingerlanneqartarmat, tamattami pingaarteqaarput inuit innarluutillit allatuulli naligiimmik periarfissaqartinneqarlutik inooqataassasut.

Nuannaarutissaavoq qinigaaffiit kingullit marluk qiviaraanni qulequttat Inuit Inarluutillit naligiimmik periarfissaqartinneqarlutik naleqarluartumillu inuiaqatigiinni inooqataannissaannut ikorfartuisussat ataatsimoorfiulluarlutik ingerlanneqartasimammata. Naalakkersuisut akissutaanni naqissuserneqarpoq Naalagaaffiit Peqatigiit inuit innarluutillit pillugit isumaqatigiissutaat naapertorlugu inuit innarluutillit allat assigalugit suliffeqarsinnaatitaasut soorlutaaq aamma isumaqatigiissummi allassimasoq naalagaaffiit isumaqatigiissummut peqataasut ilinniartitaanermut peqataalersitsinissaq tassani qularnaarsimaneqaqqullugu.

Inuit innarluutillit pineqartillugit pitsanngorsaait assigiinngisitaartorpassuit inerisarneqartariaqartut tamatta takusinnaavarput, inuit qulequttap iluanni pisariaqartitaat assigiinngisitaartorpassummata. Tunngaviumilli ilumut ilorraap tungaanut ingerlanerput takuneqarsinnaallunilu uuttortarneqarsinnaassappat kisitsisit ilisimasallu katersorneqarnissaat pisariaqartippavut tamannalu tuaviortumik naammassineqartariaqartoq Siumumiit isumaqarpugut.

Naalagaaffit Peqatigiit Inuit innarluutillit pillugit isumaqatigiissutaat tamakkiisumik nunatsinni naammassinnissappat siulliullugu qiviagassarput tassaavoq Atuarfitalak. Atuarfitalak tassaasusaaq meeqqat pisariaqartitaannik tamanik kivitsisusaaq. Taamaakkaluartoq ullumi kisitsisaatiginngilagut meeqqat immikkut pisariaqartitsisut qassit inaarutaasumik meeqqat

02. april 2019

UPA 2019/128

atuarfianni misilitsissimanersut. Nassuerutigisariaqarparput ajornartorsiutivut annertuut tassannga tamakkiisumik kivitsisinnaannginnitsinnik aallaaveqarmata, soorlutaaq aamma atuaqatigiit immikkut pisariaqartitsisut inaarutaasumik misilitsinnissamut qularnaarsimaneqannginneri tassannga aallaaveqartut.

Taamak oqaaseqarluta aalajangiiffigisassatut siunnersuut ataatsimiitsitaliamut ingerlateqqinneqassasoq innersuussutigaarput, tamannali ima paasineqassanngilaq suliat marloqiusamik ingerlanneqassasut, Naalackersuisummi akissutaanni takusinnaavarput suliaakkiissutigiumaneqartoq pillugu suliat aallartisarneqalereersimasut. Ataatsimiitsitaliamut ingerlateqqipparput kissaatigigatsigu suliat ataatsimiitsitaliaq peqatigalugu ingerlanneqassasut, ataatsimiitsitaliamiilli uku eqqumaffigineqassasut kissaatigaarput.

- Paasissutissat pineqartut kommunit peqatigalugit katersulertorneqassasut
- Atuarfitalak tamanik kivitsissasoq aamma meeqqat immikkut pisariaqartitsisut eqqarsaatigalugit qularnaarneqassasoq inaarutaasumik tamat pinnaatitaaffigigaat inaarutaasumik misilitsinnissaq.
- Immikkoortoq pineqartoq Isumaginninnermut Naalackersuisoq kiisalu Ilinniartitaanermut Naalackersuisup susassaqrifiit akimorlugit suleqatigiissutigissagaat.
- Qulequtaq pineqartoq pillugu Innarluutillit Illersuisuat peqataatillugu suliat ataqatigiissumik ingerlanneqassasut

Taamak oqaaseqarluta Naalackersuisut sulilluarnissaannik kissaappavut immikkoortorlu Ilaqtariinnermut Isumaginninnermullu ataatsimiitsitaliamut ingerlateqqipparput ataatsimiitsitaliarlu pineqartoq kaammattorumavarput Ilinniartitaanermut ataatsimiitsitaliamik suleqateqaqqullugit. Ataatsimiitsitaliat sulilluarnissaannik kissaallugit...

Inatsisartunut ilaasortaq, Jess Svane - Siumut